

Bot nelayan Vietnam rempuh bot APMM

Seorang nelayan warga Vietnam maut terkena tembakan anggota APMM

Oleh HAZELEN LIANA KAMARUDIN dan ADILA SHARINNI WAHID

PASIR PUTEH

Dua bot nelayan warga Vietnam bertindak agresif apabila merempuh dan melemparkan bom ke atas bot Agensi Penguatkuasaan Maritim Malaysia (APMM) Kelantan bagi mengelakkan bot mereka diperiksa dalam kejadian jam 3.30 petang kelmarin.

Enggan menyerah diri, 19 nelayan asing itu bertindak ganas dengan melakukan serangan 'ala hendap' sehingga memaksa anggota APMM melepaskan tembakan ke udara sebagai amaran.

Pengarah APMM Kelantan, Kapten Maritim Muhd Nur Syam Asmawie Yaacob berkata, tindakan itu dilakukan bagi mempertahankan keselamatan nyawa anggota pasukan dan aset kerajaan.

"Kedegilan nelayan asing untuk menghentikan bot mereka dan menyerah diri serta bertindak agresif itu mengancam keselamatan nyawa anggota bertugas serta mencabar kedaulatan undang-undang negara.

"Sejurus tembakan amaran dilepaskan, kumpulan nelayan itu terus bertindak melemparkan beberapa bom jenis petrol dan diesel serta membaling getah yang dicucuh api ke arah bot Penyelamat 7



Muhd Nur Syam Asmawie menunjukkan bot nelayan warga Vietnam yang telah bertindak menyerang aset APMM dalam kejadian di perairan yang terletak 81 batu nautika dari muara Tok Bali, Kelantan.

supaya bot kami terbakar," katanya pada sidang akhbar di sini semalam.

Menurutnya, tidak cukup dengan itu objek keras juga dilempar bertalu-talu ke arah anggota hingga menyebabkan terdapat bahagian bot yang pecah.

Katanya, rentetan rempuhan itu Bot Penyelamat 7 telah mengalami kerosakan di bahagian atas bot manakala salah seorang awak-awak Vietnam maut terkena tembakan.

"Mayatnya dibawa ke Hospital Tengku Anis untuk tindakan lanjut.

"Pemeriksaan ke atas bot pertama mendapati seramai 16 awak-awak termasuk tekong berada di atas bot berkenaan," katanya.

Beliau berkata, pemeriksaan ke atas bot kedua telah menemui tiga awak-awak termasuk tekong.

Katanya, pemeriksaan lanjut ke atas bot itu mendapati kedua-duanya tidak memiliki permit menangkap ikan di bawah Akta Perikanan 1985.

"Keseluruhan rampasan termasuk bot, hasil tangkapan dan diesel dianggarkan bernilai RM2 juta," katanya.

Sementara itu, Ketua Polis Kelantan, Deputy Komisioner Shafien Mamat memaklumkan, pihaknya menerima laporan berhubung kejadian terbabit.

Katanya, berdasarkan maklumat awal, APMM menjalankan operasi Kuda Laut di kawasan 81 batu nautika dari Jeti Tok Bali dan bot berkenaan dipercayai mencerooboh perairan negara lalu mengarahkannya berhent.

"Ketika itu berlaku provokasi daripada nelayan warga asing berkenaan menyebabkan pihak berkuasa melepaskan tembakan dan terkena pada badan mangsa.

"Mangsa dikejarkan ke hospital namun disahkan meninggal dunia manakala 12 lagi nelayan asing yang berada di atas bot berkenaan ditahan.

"Dalam melaksanakan penugasan ada garis panduan yang membolehkan pihak berkuasa untuk melepaskan tembakan tetapi kes ini masih disiasat. Kita sedang menunggu laporan bedah siasat," katanya di Ibu Pejabat Polis Kontinjen di sini semalam.

Kes perairan negara diceroboh nelayan asing

16 Mei 2020

APMM Terengganu mengusir keluar 50 bot nelayan Vietnam yang mencerooboh perairan Malaysia sejak tempoh Perintah Kawalan Pergerakan (PKP) dikuatkuasakan Mac lalu.

28 Jun 2020

Dua bot nelayan bersama 27 tekong dan awak-awak Vietnam ditahan APMM Terengganu pada jarak 100 hingga 101 batu nautika dari Kuala Terengganu dalam Op Khas Naga di perairan Terengganu.

29 Jun 2020

Lima nelayan warga Indonesia ditahan APMM Sarawak kerana menangkap ikan di perairan negara di 119 batu nautika dari utara Tanjung Sirik, Sarikei.

2 Julai 2020

APMM Terengganu menahan dua bot nelayan mencurigakan bersama 27 nelayan warga negara Vietnam yang membabitkan hasil rampasan bernilai hampir RM2 juta dalam Ops Iman di perairan Terengganu pada jarak 134.6 batu nautika dari Kuala Terengganu.

10 Julai 2020

Seramai 12 nelayan Vietnam termasuk dua remaja berusia 14 dan 15 tahun ditahan APMM Kelantan kerana mencerooboh perairan Malaysia di perairan 79.7 batu nautika dari muara Tok Bali.

19 Julai 2020

APMM Terengganu merampas tujuh bot nelayan Vietnam berserta 83 orang termasuk tekong dan awak-awak berusia antara 16 hingga 68 tahun dalam Ops Kuda Laut.

5 Oktober 2020

Seramai 16 nelayan Vietnam bertindak terjun dan berenang sejauh 100 meter sebelum memanjat tangga pelantar minyak dalam usaha melarikan diri bagi mengelak ditahan APMM Terengganu ketika Op Naga Barat dan Op Iman di perairan berhampiran pelantar Begading.

9 Ogos 2020

Kapal Maritim (KM) Tok Bali memberkas tekong dan kru kapal melibatkan dua bot nelayan Vietnam kerana mencerooboh serta mencuri hasil laut di perairan negara pada jarak 94 batu nautika dan 107 batu nautika dari muara Kuala Terengganu dalam Op Kuda Laut Siri I/2020 di perairan Terengganu.

12 Ogos 2020

APMM Zon Maritim Tanjung Manis menahan tiga nelayan Vietnam di perairan Tanjung Sirik dalam gerakan Op Naga Timur dan Op Permai di kedudukan 33 batu nautika di utara Tanjung Sirik.

16 Ogos 2020

APMM Sabah menahan sebuah bot nelayan bersama 25 nelayan warga negara Vietnam dan merampas 4 tan ikan pelbagai jenis di kedudukan lebih kurang 29 batu nautika barat laut Pulau Mantanani.